

東
華
續
錄

東華續錄

咸豐五十三年

臣王先謙敬編

臣陶澐宣恭校

冬十月辛卯朔享太廟○和春福濟奏八月二十五日張落刑

由夏邑竄至碭山縣境九月初一日竄商邱縣馬牧集將集攻破大肆焚掠見在陸續南竄有赴亳滋擾之說總兵興慶已由碭山拔營赴江皖交界駐紮道員王夢齡亦挑壯勇六百名隨後接應嗣據潁州府知府陸希湜等稟初九日河南捻匪大股到豫皖交界之泥臺店該員等令宮國勳守城親督兵勇迎頭截擊至曹家店轉戰兩時斃匪百餘名無如逆眾萬餘拚死衝突署安慶府知府牛鎮墜馬傷臂州判劉瀛階亦受槍傷該匪在亳州河北一帶窺伺州城陸希湜朱連泰均在城外紮營以兵勇單弱請撥兵接

應等因臣等當飛咨秦定三飭見駐舒城之遊擊武全帶領潁州營兵五百名星速馳援一面檄飭徐州鎮道以勦爲堵相機籌辦並催托明阿撥兵駐徐以便徐防官兵趕緊前進一面咨會英桂飭張維翰等併力圍攻仍飭朱連泰等固守亳州先就見有兵力認真攻勦不得專恃外援坐失機宜至潁亳土匪數載以來雖屢經懲創而東擎西竄實無休息之時見籌三省會勦原期淨絕根株爲一勞永逸之計惟河南江蘇安徽兵勇統計不下七八千人如無大員統帶恐事權不一勢將推諉遷延查見駐曹州防河之湖南提督武隆額臣福濟深知其老成練達任事實心合無仰懇天恩飭令武隆額就近由山東酌帶得力兵弁迅赴亳州駐紮三省會勦兵勇悉歸節制以期呼應較靈易於得手 上諭軍機大臣等見在歸德捻匪竄回皖境在亳州河北一帶窺伺州城業

經官兵殺斃多名惟陸希湜朱連泰均在城外紮營以兵力單弱稟請撥兵接應自應趕緊合力會剿據奏河南江蘇安徽三省兵勇不下七八千人急需大員統帶著崇恩卽行傳旨令武隆額由山東酌帶得力兵弁迅卽赴亳州駐紮所有三省會剿兵勇悉歸調度以專責成如山東省兵不能多撥卽著該撫酌撥數百名交該提督統帶前往至托明阿所派侍衛容照帶兵赴豫前已諭知該大臣飭令徑往潁毫一帶會剿不得在徐州駐紮其楊以增派往之代理徐州鎮總兵興慶等並英桂所派之張維翰等及和春等派往之遊擊武全所帶兵勇著統歸武隆額節制武隆額赴皖後曹州防河事宜著崇恩另派妥員接管毋稍疏懈著和春等嚴飭朱連泰等就見有兵勇上緊攻擊毋得專待各路兵勇轉致遷延貽誤將此由五百里各諭令知之○胡林翼奏臣自將水陸諸

軍嚴爲裁汰點覈軍籍以求簡練卽函知道員羅懋南約期夾剿金口併攻武漢署臬司李孟羣副將王國才派於北岸步步爲營以冀迎會北兵漸圖漢陽臣正擬督軍深入力剿爲客兵之前導而羅澤南由南康疾馳入境已先有通城之捷計是役斬賊約三千餘名羅澤南由通城直搗桂口分三路進攻奪桂口之險臣當卽飛飭羅澤南從崇陽蒲圻由驛路進取新店金口以期會合臣軍速攻武昌報聞○和春等奏遵查宋培之並無開門迎賊情事胡元煒尙無下落得旨該犯隱忍偷生無恥已極姑念其身已斃著毋庸議胡元煒寶在下落仍著確查○追予安徽陣亡參將李成虎於全椒縣建祠○予河南陣亡參將達凌阿祭葬世職○王辰河南巡撫英桂奏捻首張落刑等自馬收集竄回亳境意圖窺伺州城經副將朱連泰等晝夜嚴防調集附近團練會同城內兵

勇合力迎勦在馬廠接仗斃匪百餘復經鹿邑柘城等縣練勇前往助勦該匪於九月十七八等日潛往東北一帶竄逸查此股擒匪未經痛勦勢必復來添調駐防滿洲營官兵三百餘員名派佐領春塔管帶前赴歸德由余炳燾調遣會同江皖兩省兵勇訂期會勦以期殲除淨盡又霍邱擒匪李兆受等於九月初八日自牛皮碰竄至霍境攢板衝經練勇鄔立功探知暗約各勇分路設伏出其不意開放槍礮轟斃擒匪六七十人生擒擒首馬三及夥黨三人餘匪逃散初九日各鄉練勇從東路進勦該匪分三路迎敵都司沙春元會同各營兵勇亦分三路兜擊斃匪百數十人初十日復在石牌斃匪多名餘匪遁回麻埠王庭蘭移紮霍邱開順街張曜進駐霍境金家寨六安霍邱商城各要隘亦經各地方官嚴密布置聲勢尙爲聯絡臣咨會王庭蘭務須慎重籌畫會同皖省

官軍相機堵剿不可稍有疏虞報聞○乙未諭軍機大臣等邵燦奏請嚴扼北洋島嶼並雇船捕盜護漕一摺以佘山石島爲寄碇之所以牛莊爲裝卸貨物之地盜艇伺劫多在該三處口岸必須嚴行扼守始能保護新漕前據何桂清奏甯波上海商人各雇用火輪船一隻以一隻駐泊佘山以一隻在南洋梭織巡護本日復據邵燦奏由商捐雇網稍船二十隻與浙江商船合力駐守佘山是南洋盜艇當可絕其來源其北洋牛莊石島等處亦應豫籌扼堵著英隆書元崇恩嚴飭水師將弁實力巡哨認真剿捕務使匪船無從窺伺以利漕行至海船沙運自十激放洋後向派武職大員長途押護據該漕督奏稱徒滋糜費實則虛應故事自係實情此次海運卽毋庸專派水師大員著怡良吉爾杭阿何桂清崇恩賁成沿海水師逐程遞護何處見有盜踪卽將何處水師員弁參

辦不得互相推諉致有疏失再浙江新漕業於十月內開局江蘇漕務情形尙未據該督撫奏報前經催令趕辦於年內一律受兌著怡良等迅速遵辦並將開局日期及起運米數先行奏報毋任再延將此各諭令知之○諭寄諭安徽巡撫福濟河南巡撫英桂張之萬奏永亳擒匪猖獗請飭皖豫兩省速行會剿一摺據稱擒匪蘇添幅張落刑等逆燄甚熾由歸德竄回雒河集盤踞老巢河南之兵見集歸德而豫省已無賊蹤皖省之兵漸集亳州而城下已無賊踞恐兩省各分畛域苟且了事不思合力捕剿殲厥渠魁請特派大員統領節制並請飭皖豫各撫令祝壇陸希湜整頓鄉團以助官軍等語前因三省奏剿擒匪已有旨令武隆額卽赴亳州所有三省會剿兵勇悉歸調度該提督不日卽可抵皖著該撫等卽傳旨武隆額迅督三省兵勇務將該匪老巢平毀著名擒首

悉數擒獲以靖地方儻帶兵各員有逗畱株守情事卽著嚴行參辦毋稍姑容並著飭令祝垵陸希湜於歸潁兩府鄉團實力整頓會同防剿兵勇於兩省交界地方逐細嚴查勿任零匪復行聚積並著妥議章程於每月定期會查以爲永安之計再此次擒匪肆掠歸德亳州一帶慘遭荼毒被害良民恐一時未能安業著各該撫等確切查明有應行蠲緩錢糧之處卽行具奏候朕加恩將此由五百里各諭令知之○丁酉諭內閣和春福濟奏克復廬州府城將逆匪殲戮淨盡一摺廬州逆匪負隅抗拒疊次外援之賊均經我軍擊退該逆猶死拒待援我兵晝夜嚴攻至本月初一日和春等派總兵珠克登等各帶兵勇乘夜分攻各門和春福濟親督攻剿鄭魁士帶同儘先守備馬昇平朱承先等潛至城根豎立雲梯都司熊天喜余成蛟帶兵突上北門首先登城槍箭並發賊匪

驚亂適都司于昌麟亦由小東門登城燒賊更棚副將嵩瑞等由東門翻城殺進同時各門官兵均各緣梯而上砍殺守城賊匪該逆東竄西逃悉遇官兵殺斃適城中內應紳民王子顧等亦在各門放火接應我軍乘勢衝下槍礮齊施逆眾塞路填衢自相踐踏合肥被擄百姓歡聲振地隨同殺賊廬州府城當時克復統計是日斃賊五千餘人割獲首級二千餘顆其賊首僞指揮陳姓僞丞相王姓均在城中賊館被焚生擒三百零七名內有僞師帥等十七名均卽訊明正法奪獲礮械等件不計其數廬州府城被陷將及二年和春等帶兵攻剿雖遷延日久此次督兵奮勇補過俾堅城克復醜類盡殲調度有方辦理尙爲妥協仍著該提督等督率將士將舒巢各屬賊匪乘此聲威次第迅速掃蕩以靖逆氛○諭軍機大臣等和春福濟奏督率兵勇乘夜克復廬州一摺逆匪竄

踞廬城將及二年經和春等督兵圍逼乘機克復俾江北關鍵之區不至久爲賊踞惟舒城巢縣廬江等處附近廬州尙多賊蹤沿江一帶逆匪亦未剿除必須乘此聲威次第進剿如能再克安慶則金陵之賊其勢已孤我軍水陸進攻剿辦自易爲力該提督等所帶兵勇爲數甚多此時應卽移師進剿何處著悉心籌畫迅圖掃蕩逆氛廬州陷賊已久居民慘遭蹂躪一切善後事宜著該撫妥爲辦理該處紳民被賊裹脅究能悔罪立功能爲我軍內應著該提督等確切查明擇其實在出力者分別保奏以勵民心將此由六百里諭令知之○諭前因向榮奏潮勇在蘇州滋擾諭令怡良等設法令其回籍或分配各營歸武弁管帶諒已遵照辦理茲據侍郎羅惇衍奏稱蘇州閭門外嶺南會館左右潮勇盤踞把持居民行旅受其魚肉惠潮無賴之徒由海至蘇日聚日多人心震

動賴已革閩浙總督顏伯黶善爲訓導請飭鎮撫等語已明降諭旨將顏伯黶交怡良等差遣委用矣該革員籍隸廣東見在流寓蘇州如果能勸導潮勇使不爲匪著卽飭令會同地方官妥爲約束設法辦理能令其由海道回籍毋使日久盤踞方爲妥善惟該勇獷悍性成趨利如鶩尤不可有名無實任其暫行避匿去而復來徒滋糜費並著於沿海要口嚴密稽查杜其來路其分配各營之勇務須嚴飭將弁妥爲鈐束以期消患未萌將此諭令知之○諭楊以增奏堵剿捻匪獲勝見籌會剿一摺前因江蘇安徽河南三省會剿捻匪急須大員統帶兵勇已諭知崇恩傳旨令新授湖南提督武隆額由山東帶兵卽赴亳州駐紮各省兵勇悉歸該提督調度並諭和春等將楊以增所派興慶帶往之兵一併歸武隆額節制茲據楊以增奏該署鎮興慶已於虞碭交界之處疊次斃

匪多名探得該匪首張落刑竄至商邱地方並有率眾攻亳州之信飛飭該鎮道固守藩離等語見在潁毫一帶擒匪猖獗殊甚必得趕緊會剿方可一鼓殲除著楊以增卽飭興慶迅帶兵勇與容照所帶吉林馬隊會同前進聽候武隆額調遣務將此股擒匪迅速兜剿毋稍遲延將此諭令知之○和春等奏克復廬州府城得旨汝等雖遷延於前尙能補過於後俾堅城克復盡殲醜類當此兵勞餉乏之時皆賴眾將士勦力同心迅奏厥功欣慰之餘倍增憫念○命已革閩浙總督顏伯燾赴江蘇軍營交兩江總督怡良差委○以克復廬州府城賞提督和春黃馬褂騎都尉世職巡撫福濟太子少保頭品頂帶副都統麟瑞常清頭品頂帶總兵官鄭魁士提督銜餘升敘有差○免合肥縣咸豐四五年額賦永廣文武學額各三名○戊戌諭軍機大臣等前因曾國藩奏江西舉

人彭壽頤控告萬載縣知縣李皓棄城逃走鄉民彭才三等餽賊財物陳啟邁徇庇不辦轉將首告之舉人彭壽頤坐以誣告之罪當降旨令文俊查明具奏本日據都察院奏彭壽頤遭抱告彭珠鳳以上年在籍辦理團練有莠民餽賊阻團縣官棄城避賊詐賊傾陷各重情並臚列巡撫失守不奏各款十四條赴該衙門呈控曾國藩前參陳啟邁各款均交文俊查辦彭壽頤所控本在查辦之列著該撫於抵省後即將陳啟邁被參各款與此案一併查訊務須秉公研究毋得稍有不實不盡至文俊簡任江西巡撫已有數月該省尙多應辦之事著卽趕緊前進迅速赴任毋再稽延將此諭令知之○己亥 上詣迎暉殿 孝靜康慈皇后几筵前行月祭禮○諭內閣戶部奏楚岸鹽斤抽稅章程久未奏報請飭查明聲覆等語前因湖南湖北借運川粵官鹽經該部奏准凡川粵

鹽斤入楚時無論商民均許自行販鬻於楚省堵私要口專駐道府大員設關抽稅並令川廣兩省將商支外款大加裁減妥議章程責成湖南藩司熟籌妥辦見在川粵接濟楚省鹽斤辦理已經兩載該省如何議立章程接引抽稅之處並未據該督等詳晰覆奏著湖廣督撫等查明見辦章程迅速具奏毋稍稽延○諭軍機大臣等戶部奏請飭湖南浙江各巡撫將該省鹽茶互運以充軍餉一摺據稱湖南爲產茶之區近年銷路阻滯茶價極賤所缺者惟鹽浙省所存鹽尙多而茶之銷路頗廣擬請由浙運鹽十餘萬引赴湖南易茶十餘萬道庶楚省無虞乏鹽而浙省之茶亦可暢銷應令各該撫設法籌辦等語見在軍餉浩繁籌撥維艱楚浙鹽茶既可彼此交易自應亟籌互運以便民用而裕餉需著何桂清駱秉章悉心斟酌各將成本運本設法籌備湖南省則將民間積

存之茶收買十餘萬道運赴江西樟樹鎮地方浙江卽籌鹽十餘萬引亦運至該處彼此豫行知照到時互相交卸分路銷售如一時難於籌款各先運二三萬以後陸續籌運亦無不可至彼此銷售後除去成本運腳各費外贏餘銀兩卽著覈實報部以備京餉及江楚之用該撫等務當揀派賢員盡心妥辦至沿途運解時各該地方官尤當派委弁兵小心護送毋稍疏虞並著何桂清等卽將辦理章程妥速籌議先行具奏原摺著鈔給閱看將此由五百里各諭令知之○諭前據駱秉章奏採買淮鹽以濟民食並准楚分岸納課以濟軍需一摺當交軍機大臣會同戶部妥議具奏茲據文慶等奏稱湖南長沙等府屬每年額銷淮鹽二十二萬餘引見在淮南片引不行需鹽甚急請飭兩江總督備鹽十萬引解赴湖南並飭浙江江蘇巡撫派員實力稽查等語淮南鹽引自江路

梗塞片引不行屢經戶部奏請設法疏銷力求整頓見在湖南鹽價日昂民間茹淡自應急籌運解以濟民食而裕國課著怡良卽督飭署運使郭沛霖迅速備鹽十萬引解赴湖南准鹽成本甚輕雖運本較重而湖南鹽價極昂除完引課之外成本運本不患無著該督務必趕緊設法籌墊不得以無款可籌畏難推諉致誤要需其經過浙鹽引地侵灌之弊不可不防著責成督運之員嚴飭船戶不准片刻停泊並著吉爾杭阿何桂清分派委員於沿途扼要之處實力稽查不准疏懈路過江西時並著文俊飭令該地方官一體照料毋誤進行原摺著鈔給閱看將此由五百里各諭令知之並傳諭陸元烺知之○命柏貴來京陛見以葉名琛兼署廣東巡撫○庚子向榮奏蕪湖外援賊壘經我兵鏟盡後卽移丁橋弋磯一帶與師船合圍扼剿鄧紹良復派撥兵勇潛往范羅山右

縱火焚襲賊卡逆眾驚竄斬殺數十人將卡牆悉行犁毀吳全美督領紅單各船進攻礮隄石壘斃賊不少陸軍亦乘勝力攻該逆堅守不出江北有賊數千由西梁山竄至東梁山分屯嘯聚另股欲由裕溪口渡江應援東梁山賊黨分至松園四合山馬廠等處築壘均經鄧紹良吳全美分帶兵勇進攻斃賊甚多越日東梁山復來賊五六千人直竄丁橋一帶並於范羅山等處褻延築壘副將蔡應龍馳往截剿行過丁橋數里該逆見我兵兩路兜至卽大股衝來抵敵我軍爭先縱擊追斬百數十名擠撲落水者尤眾江北雍家鎮賊黨又突來三四千人欲於蠓磯廟築壘吳全美駛往防剿鄧紹良撥陸兵渡江協剿擊倒賊中望樓兩座李德麟等船前赴雙港堵賊上游在荻港打仗將神灘河對渡賊船擊沈大小十數隻溺斃甚眾追獲逆船四隻泥汊河江面賊船經遊擊唐國

棟等追擊燒沈十四隻奪獲三隻臣思范羅山各壘餘賊經我軍

水陸合圍接濟已斷勢窮蹙乃該逆復於對江竄踞意圖聯絡

援應阻礙舟師若不趕緊攻毀使沿隄逆壘頻添恐水師兩面受

敵當經嚴飭吳全美作速圖攻並檄鄧紹夏渡江協剿連日疊有

斬獲范羅山營中之賊見我軍出江分剿乘虛衝竄官軍分路夾

攻直抵范羅山賊壘施放火具兼開槍礮賊眾驚擾千總楊國正

等帶勇爬越賊牆黔勇雷大員突被賊礮中腹腸出仍大聲呼眾

繼上旋又被礮跌落登時殞命守備胡德順聞聲首先擁撲槍礮

愈多將守牆賊紛紛擊斃遙見哨樓有黃衣賊首搖旗指揮胡得

順躍近一箭即應絃而斃我軍復對哨樓攢轟倒壓多賊該逆仍

死守拒戰同知鄭濟美等帶勇接應衝上合力併攻胡德順繞過

壘門飛身撲上不料被賊礮中頭額登時陣亡是時丁橋陡門武

陶一帶亦均有賊先後來犯經兵勇力戰擊退臣見催飭鄧紹夏
內外妥籌嚴防衝突並責成吳全美李德麟斷賊江面以期早靖
蕪湖至守備胡德順身經百戰被礮陣亡實屬忠勇絕倫深堪憫
惜請旨飭部照遊擊陣亡例從優議卹得旨著嚴飭鄧紹夏吳全
美等兩岸迅圖堵蕩勿令該逆南北聲氣相通致師船進退兩難
胡德順著照遊擊陣亡例議卹○辛丑諭軍機大臣等蔣霽遠等
奏苗匪肆擾廳營失守一摺據稱漢苗賊匪於七月二十五六等
日由都勻府屬獨山州之三腳壠汛攻撲都江廳城正在接戰突
見城內火起賊眾擁入八月十三四等日復有賊數千竄至高舊
地方攻撲營盤汛兵潰散遊擊陣亡各等語該處與都勻八寨荔
波獨山古州下江各府廳州縣毗連凱里一帶已爲賊阻亟應嚴
防竄越見經該撫派貴東道承齡駐紮清平斷其上竄之路著卽

責成該道並各該管文武員弁督帶兵勇上緊攻勦務將都江廳城剋期收復不得專以防其上竄爲詞將此由六百里諭令知之○諭見在貴州勦辦苗匪所調四川雲南兵勇陸續到齊餉需更鉅廣東土匪已漸肅清該省開稅一切諒有起色著葉名琛等移緩就急無論何款籌銀二十萬兩速解貴州惟粵黔道遠一時未能速到著駱秉章先籌銀數萬兩就近解往貴州俟粵餉起解過湖南時卽可照數截畱歸款該督等卽遵諭迅速籌撥毋誤要需再前據向榮奏潮勇在蘇州滋擾去年至本年五六月又有多名至自乍浦上海等處不易遣散又據羅惇衍奏蘇州嶺南會館潮勇盤踞把持惠潮無賴之徒由海至蘇日聚日多各等語著葉名琛柏貴隨時設法嚴禁並飭各海口嚴加稽察毋令再行出境致滋事端將此由六百里各諭令知之○諭前因湖北賊勢猖獗荆

州喫緊曾諭令黃宗漢飭催署松潘鎮總兵德恩帶夔巫防兵二千名迅赴荊州防剿並令再撥兵勇數千名於將軍樂斌提督萬福二員中酌量一員統帶赴荊以資援應本日據官文奏漢陽逆匪傾巢上竄官兵失利漢川復失該逆竄至鄆家灣麥旺背一帶恐其窺伺荊襄大局攸關必得添兵防備德恩所帶防兵著卽嚴催迅赴荊襄候官文調遣毋稍遲誤續撥赴京兵勇究有若干樂斌萬福二員何人可往並著一面籌度一面迅速具奏又據蔣霽遠奏貴州苗匪肆擾都江廳失守並陳兵單餉絀情形等語川省距黔尙近撥解可期迅速著黃宗漢再行籌畫儘可移緩就急酌撥銀十萬兩速解貴州以應急需前調四川參將蔣玉龍並著飭令迅速赴黔聽候蔣霽遠差遣將此由六百里加緊各諭令知之○諭官文奏漢川復失中路官軍失利一摺前據該大臣奏中路

情形尙可無虞又奏常恩帶兵進襲蔡店各摺似尙有把握何以數日之間遽有此失據稱漢川失守後鄆家灣之軍亦相繼潰挫逆眾已至麥旺紫盤踞是中路情形萬分喫緊李孟羣業於九月十六日由沙湖至仙桃鎮中途各軍已有旨令其就近調度何以此次摺內尙稱飛催該署臬司迅赴襄河該署臬司係專辦中路之員豈可任其久駐潛沔之間至下游賊蹤猖獗上竄著官文嚴飭李孟羣迅卽前進所有襄河上下賊匪責令一力攻剿該大臣得以先顧德安不受牽掣該大臣自鍾祥京山一路行走至今尙未行抵德安亦未免過於遲滯著迅速啟程一面向接受關防督辦北路攻剿事宜一面兼顧前路並將潛沔等處妥爲布置毋任顧此失彼常恩魁玉錫齡阿不能實力堵禦著該大臣卽將該員等潰散情形查明具奏前此收復漢川是否派有駐守員弁此次失

守亦著查明下落一併具奏將此由六百里加緊各諭令知之○
以都江廳城被賊竄陷巡撫蔣霽遠提督孝順等下部議處予陣
亡遊擊興瑞祭葬世職○壬寅官文奏臣昨奉諭旨授爲欽差大
臣兼程馳赴德安督催前隊顏朝斌等進逼郡城設法攻剿賊匪
連日出拒均被官兵擊退該逆見我兵攻城甚急分股出城盤踞
義塘陳家店等處爲犄角之勢意在鈔襲我軍後路臣督飭中隊
兵勇已抵德安府境惟查北路各營馬隊尙稱得力其步隊兵勇
屢經潰挫殊不可恃見在南路攻剿正值喫緊臣若繞赴北路未
免紆遲臣接受關防後所有馬隊仍派西凌阿綿洵管帶步隊兵
勇派訥欽等管帶由北路合力進攻一面督飭南路官兵分投圍
剿嚴防後路見在宋河新募勁勇二千名卽令協同官兵直取郡
城並曉諭附近各鄉整飭團練防賊旁竄如此嚴密布置計日可

期得手至漢陽賊匪上竄鄆家灣一帶經張起鳳等擊退茲據李錦鑾稟報賊蹤竄擾沔陽誠恐窺伺金沙已令李保邦管帶勁勇三千名馳赴迎擊該員督齊後隊前往策應務期撲滅等情臣並飭魁玉錫齡阿整齊兵勇力扼後路接應前軍痛加剿洗又奏臣所添南路兵勇會合北營馬隊隨州安陸等處團練於十月初四日辰刻俱各奮勇進攻直抵城下四處放火齊力圍擊殲斃城外賊匪多名該逆敗退入城我軍乘勝奪門而入遇賊卽殺斃賊無算將德安府城克復見在督兵追剿逸匪以期一律肅清臣一面辦理善後事宜卽行振旅南下察哈爾都統西凌阿等奏自八月十六十八等日南北路官兵殲剿逆匪設法挑誘賊眾堅不出戰臣等趕備雲梯等具定於十月初三日大舉全隊進攻察看情形乘夜襲取我軍三面於午刻直抵城下更番攻擊該逆暗從堞孔

施放槍礮我兵仰施火槍賊眾鼠伏遑難得手候至夜開豎梯進攻不料起更時風雨大作徹夜不休逆匪乘虛潛出南門冒雨南竄臣等派勇進城接獲餘賊二百餘名跟追二十餘里大股賊匪業已走向孝感一路逃回武漢並飭馬隊分赴各鄉接捕匿賊見在德安一帶雖已肅清而武漢尚未克復恐其復生覬覦不得不留兵駐紮臣等將新到馬隊二千名卽派副都統都興阿統帶仍紮德安原營以壯北路聲威令勇目施紹恆等各帶義勇已革提督謝欽等分帶馬隊官兵趕緊追剿臣等卽督隊前進如果餘賊竄歸武漢自當相度機宜合力攻剿胡林翼奏道員羅澤南探聞桂口之賊竄入崇陽於城南江邊山顛紮大營二座毀城內屋輒砌壘高二丈壘外又以木椿竹籤層布圍繞砌斷大路以遏我師沿途設伏以圖截殺復於城東門外搭架浮橋密約通山之賊數

千人入城助戰羅澤南因會同候補道員李續賓候選訓導劉蓉兩營渡江而進知縣蔣益澧帶勇防賊後襲均循河之東岸約於浮橋東偏駐營以截賊入通山之路羅澤南等沿河西岸而進遊擊普承堯直隸州唐訓方堵賊鈔襲繞道出城之西北偏近賊營駐紮賊營已包於我軍之中彭三元駐其左李杏春駐其右賊乘我師方至營壘未修遽以六七千人自壘中分兩路而來羅澤南傳令賊不偏營不可與戰以數十人搖旗向前佯敗數次誘賊衝至營旁羅澤南率勇從山脊而下彭三元從左路堵之各般斃騎馬賊目二名兩路之賊大敗回竄狂奔思歸賊壘李杏春率勇由江邊而下圍繞賊壘奮力衝殺以截賊之歸路賊不能復入其壘唐訓方普承堯亦率勇疾進相與追殺賊繞城之西北冀由東門渡江而逃李續賓劉蓉蔣益澧由東岸山內殺出兩岸約共斃賊

六七百名賊乃入城閉門自守羅澤南擇勇二千人分作數十隊
伏於兩岸要隘簡選敢戰之士於二更時攜沙囊負雲梯緣壁而
上拋放火毬火箭光燄燭天兩岸伏勇各擊鼓吹角施放槍礮城
中之賊大亂遽開北門而出踐斃於城甕者以數百計踰城墮死
者無數其得出城者又爲各路之勇截殺千餘人諸勇乘勝而入
當將崇陽縣城克復至臣之水陸各師於通城桂口告捷之後揣
度賊情必由蒲咸下竄以與省城之賊相通因派陸師三千餘礮
船十餘隻由六溪口橫入蒲圻地界駐營於車埠以各營分布四
面並約會羅澤南定期夾攻因岳州防兵進剿微挫且探聞僞易
王石達開以羣賊數萬人上竄盡注於武昌南岸羅澤南之兵極
精而少於賊數不止十倍崇陽餘匪技勦須嚴故援兵不能速至
翼日賊已悉眾由茅山蕭橋兩路分踞我營之前經守備何紹彩

等憑隄抵禦殺斃當先悍賊數千名賊卽敗退另股賊匪復遙擁齊下水師都司喻吉三開礮擊之橫截賊腰斃賊百十名賊復退卻我軍乘勝追之至茅山而返其蕭橋之賊股數尤多千總楊再佑領勇獨當一面匹馬衝鋒揮架殺賊立斃七人賊畏其勇折回茅山一路以撲何紹彩等之營各營奮勇抵禦賊不能支又折而聚於蕭橋一路楊再佑俟其涉水至半轟斃數十人截殺百餘人賊遂大敗退走我軍正值收隊而賊復折回回軍抵擊賊勢退卻追入山中賊眾橫出我軍之後各營俱被圍繞奮殺兩時乃出重圍軍氣稍挫是日以三千之勇敢二萬之賊鏖戰六七時之久千總楊再佑等雖以追賊深入爲賊所乘而志節不衰整飭數日仍可進剿 上諭軍機大臣等官文奏德安府城克復朕正疑此股逆匪並未大受懲創何以遽能克復頃復據西凌阿等奏初四日

天色未曙正在設法進攻該逆乘虛潛出南門冒雨南竄由孝感一路逃回武漢是德郡果非攻破竄該逆有意竄逸難保無另有詭謀西凌阿等見派施紹恆等義勇並馬隊官兵於初五日相繼進發著卽趕緊追剿官文甫抵德安該處已無賊蹤自應迅速跟蹤南下由漢川一帶直擣漢陽以分南岸賊勢卽可迅克兩城不得藉口善後逗畱德安致該逆復圖上竄中路情形喫緊仍著嚴飭李孟羣等實力堵剿何項兵勇最爲出力並著查明具奏據胡林翼奏崇陽縣城池經羅澤南帶兵克復本可卽與該撫夾攻蒲圻惟因逆賊石達開率眾數萬人上竄悉踞武昌南岸較羅澤南之軍多至十餘倍以致與胡林翼阻隔羅澤南所帶各勇雖僅五千餘人然皆精銳自江西饒州義甯轉戰無前遂能連克崇通此軍於剿賊大有關係今以數萬賊匪蟻擁相偪深虞挫失見在德

安既經收復著官文酌量派撥精兵遴委得力將弁統帶前進接應羅澤南之師以壯軍威胡林翼進勦蒲圻雖未得手小挫之後士氣尙能振作仍著激勵將士速行進攻以期與羅澤南一軍會合庶不至彼此隔絕致有疏虞○官文奏謝欽差大臣恩得旨汝既督師時時以迅圖埽蕩毋負委任之專爲念軍務貴速不可過於拘泥萬慎重於機變之中方妥○以 孝靜康慈皇后梓宮奉移 慕東陵免所過良鄉等五州縣本年額賦十分之五易州十分之七○癸卯諭內閣戶部奏統籌節用事宜請飭令各省實行鈔法錢法各等語見值度支匱乏軍餉浩繁開源節流兩無善策自推行鈔法添鑄大錢以來京城官號所存寶鈔及戶工兩局鐵錢局所鑄當五當十大錢均已日見流通藉資周轉而各直省於鑄奉部文後總未實力奉行但以鈔票大錢難以適用爲解各路

軍餉紛紛請撥見銀豈京外情形遂如此懸絕總由不肖官吏有意延閣非畏難苟安卽意圖中飽而督撫藩司視爲具文任其玩誤於應設官號因循不辦以致寶鈔大錢仍行阻滯州縣官徵銀解鈔轉得從中漁利下無以取信於民安能中外流通推行無礙耶著各省督撫按照該部摺內所議勒限三箇月將應立官號一律開設並將官號章程於接到部文一月內先行奏報其附近京城各州縣應搭收當十大錢著直隸總督出示曉諭務與制錢一律完交儻有強分低昂勒捐不收之官吏由該督據實嚴參藩司不行揭報亦卽一體參辦此外各省並著照直隸辦理至州縣收鈔不力應如何嚴定處分行鈔有效應如何優與獎敘並著吏部詳議具奏其餘摺內所議各條均著照所請行知各該統兵大臣及各省督撫認真查辦其有應行查明遵辦者並著迅速具奏○

諭軍機大臣等李鈞奏查明直隸三州縣被水情形一摺河南祥符等六縣被水地方前經張亮基徧歷查勘酌擬保衛之法三條並勸諭地方紳耆於水落後妥爲興辦據李鈞代奏後當卽諭令該河督會同英桂照議辦理茲復據李鈞會同桂良奏稱張亮基由豫入直所有長垣東明開州被水地方均已分投徧歷逐細探量其辦法易地皆然且涸退處所已有鄉民荷鍤攜筐自築小堰以衛田廬可見眾心樂從等語蘭陽漫口見擬緩堵直隸被水地方情形既與祥符等縣相同著桂良督飭各該地方官卽照張亮基前擬辦法三條勸諭各該州縣紳耆集貲辦理至順河築堰遇灣切灘堵截支流諸策用力易而見效速實爲該民人等保衛室家至計非如阻遏正流難以程功並著桂良飭令各該地方官出示剴切勸導乘此水落歸槽之際卽令紳耆人等估工集料剋期

興工仍不得稍有抑勒一切工料銀錢均由紳董經理毋得假手吏胥工竣驗收後所有出力出費各官紳均著該督分別保奏候朕施恩李鈞摺並鈔給閱看將此諭令知之○諭通政使司參議曾望顏奏潮勇沿途截搶請飭查辦一摺據稱江蘇丹陽縣屬自新豐至月河一路有潮勇結黨成羣或十數人一船或二三十人一船船上俱插潮勇旗號往來遊駛遇有商民船隻經過輒假查船爲名過船按翻將行李銀物搶掠一空甚有連船被搶者卽官紳亦不能免該地方文武畏葸不敢查拏大爲行旅之害各等語此項潮勇若係軍營招募自應約束嚴明或係無賴遊民託名滋擾亦當嚴行懲辦豈容任其肆行搶掠貽害地方著怡良吉爾杭阿查明此等匪徒派員帶兵拏獲卽在犯事地方正法梟示以杜亂萌至此項潮勇如有人管帶並將該管員弁嚴行參辦將此由

四百里各諭令知之○以朱嶠爲戶部左侍郎○甲辰諭軍機大臣等載增等奏賊匪攻陷沔陽州城旋經官兵克復一摺沔陽爲荊襄門戶雖經我兵收復而仙桃鎮鄢家灣等處均爲賊踞自應趕緊堵剿毋任上竄德安已無賊蹤該大臣卽可由漢川一帶相機進剿其夔巫防兵二千名著卽飛催赴荊應卽由荊至潛沔一帶帶會同攻剿著官文酌量調度得此生力之軍又有李孟羣所帶礮船八十餘隻在長湖駐紮兵力不爲不厚著官文載增卽飭李孟羣與魁玉等合力夾擊先將仙桃鎮等處賊匪悉數殲除該大臣卽可統領全軍進攻武漢羅澤南一軍爲賊阻隔諒已遵旨派兵前往接應沔陽州知州蕭應恩是否先期出城招集團練有無逃避情事並著官文確查具奏將此由六百里加緊各諭令知之○乙巳諭內閣滿慶奏達賴喇嘛聞 大行皇太后升遐齊集喇

嘛僧眾等經修齋並欲專遣使臣堪布赴京呈請代奏一摺該達賴喇嘛自聞 大行皇太后大事虔心嗒經並欲專遣使臣堪布等前來可嘉之至惟念西藏距京寫遠且後藏年班使臣堪布就道方殷若仍令前藏使臣堪布來京則驛路往來未免艱辛過甚著滿慶曉諭該達賴喇嘛等毋庸特遣使臣堪布來京以示朕曲加體恤之至意○駐藏大臣滿慶等奏商辦廓番夷務並飭查土兵潛逃情形得旨土兵原不可靠既有爲首起意者固應懲辦餘可免其究辦以安夷心○丙午諭軍機大臣等景瀄奏分界委員會晤夷使先行稟報情形一摺吉林委員富尼揚阿等與庫倫黑龍江委員會合前行途遇先遣迎探之委官台恆等回稱在闊吞屯地方會見俄羅斯人木里斐岳幅取出伊國圖式指稱原定界址自格爾畢齊河長起至興安嶺陽面各河長止俱俄羅斯地界

欲將黑龍江松花江左岸以及海口分給該國守護等語黑龍松
花兩江皆係中國地界何得請給該國至該使所稱自格爾畢齊
河長起至興安嶺陽面各河長止俱係該國地界有無確據上年
景瀄奏欲令該委員等前往東海將立碑分界處所查明此時三
省委員會同前往如果查明立碑處所即可杜其狡賴至黑龍江
松花江左岸其爲中國地界確然無疑著景瀄作爲己意告以中
國法制森嚴守邊大臣於邊界事宜違例奏請卽應革職治罪斷
不敢據爾國無稽之言冒昧入奏自干罪戾其闊吞屯所蓋房屋
既以防英爲名止可暫行借住至費雅哈人等居住年久斷難令
其移居景瀄俟會勘委員如何回覆卽一面剴切曉諭該國一面
將辦理情形馳奏該將軍務當遵照此諭斟酌盡善相機妥辦是
爲至要將此由五百里諭令知之○添造山東戰船二十隻○丁

未 上詣迎暉殿 孝靜康慈皇后几筵前行百日祭並釋服禮
○戊申胡林翼奏羅澤南克復崇陽後因岳州防兵挫於蒲圻之
羊樓洞虞賊上犯以牽我軍派候補道李續賓等移營羊樓洞之
西羅澤南與彭三元李杏春各帶兵勇仍紮崇陽本月二十三日
石達開統帶悍賊六七千來犯我軍分三路應之左路中路奮力
同進殺斃當先悍賊賊遂大潰而右路松林之賊愈集愈多李杏
春躍馬登山整隊以待該逆爲山所隔不知中左兩路之賊先潰
仍洶湧並進我軍突前擊之斃大旗悍賊八九名賊眾反走彭三
元督勇橫截而出殺賊最多餘悉奔白羊山往咸甯而逸計各路
共斃賊八九百人二十四日羅澤南以書促彭三元李杏春歸營
而逆賊大至槍礮環施火箭噴筒交下彭三元李杏春見賊甚眾
身先士卒擇要隘堵殺追至田隴而返我軍甫返賊又繼擁而至

如是者二三十合彭三元耳受礮傷血流滿襟李杏春勸其回營而彭三元戰益力誓同生死自卯至申鏖戰五時之久賊乃敗退羅澤南在崇陽聞信以從九李續宜率兵三百人援之並飛調蔣益澧由羊樓洞來援二十五日寅刻羅澤南自帶中營二百五十人繼進賊之在咸甯者黎明已盡數來攻數倍於前繞營三匝彭三元李杏春相誓以身許國各跨馬分路堵禦相持兩時礮子噴筒連環疊至彭三元李杏春不少卻賊之另股忽繞後路入營放火回馬救之賊眾尾追彭三元大呼殺賊手刃黃馬褂賊目一名爲羣賊殺於馬下李杏春勒馬衝至隨丁勸之走不願且罵之曰彭參將死我何獨生爲亦遂殉難把總蕭積山始終隨李杏春左右爲賊所刃把總李光熾在營守輜重聞其兄李杏春死目皆怒裂同時死之千總彭獻傑把總胡元則劉碧山率後營三百人獨

當一而與賊力戰賊不敢逼及營中火起遂各執哨旗殺入賊中而死是時勇丁以營官陣亡且戰且卻迫羅澤南督勇馳援距營十里而事已無及列隊山岡以集勇丁賊見我軍繼至不敢前追日暮乃率歸崇陽時蔣益澧已駐軍城外卽下馬相商以我師分駐崇陽羊樓兩路兵力本單乃定計以五鼓移師羊樓併力駐守羅澤南於二十六日午刻馳抵羊樓洞其老營已造飯相待方令傳餐突報大股賊匪由蒲圻來羅澤南李續賓登山審察約二萬餘賊屯聚山巔爲二大枝其一枝循山而下踰田隴吹角放槍黃旗遍野是爲賊之正兵其一偃旗息鼓草山蛇行埋匿於七里冲山內是爲賊之奇兵冀誘我師禦其正兵而其奇兵襲後撲入我營羅澤南會商各營以我師自崇陽至者血戰三日遠行百餘里令少息毋遽出戰而令劉蓉率其營以擊田隴賊陣之腰李續賓

率其營從左路石山繞出以截田隴賊陣之尾唐訓方則以其營三哨當田隴之正賊以二哨按其營前山內之伏賊普承堯則分其營爲二路按七里沖諸山之伏賊部署甫定而中營副中營左營保營之白崇陽至者羣以今日誓報昨仇爭請於前羅澤南義之因示以策應之略賊之在田隴者見訓營三哨人少直前攻撲我兵按立不動俟賊逼近突以槍礮之鑿戰移時賊不能敵劉蓉率副右營從中段橫截賊亂反旗而走諸勇圍之不得出其在後者回奔山上遇李續賓右營已繞至山巔截殺蔣益澧率左營策應賊之正兵大敗而山內之伏賊不知也猶踴躍思出中營副中營從左路無賊之處繞出山巔將賊包裹其中普承堯則率其營直從山口分路迎頭殺入老竇營繼之賊之奇兵亦大敗各勇分途追殺十餘里計其斃賊九百餘名訊據賊供僞國宗韋俊自鄂

省率賊二萬餘由紙坊至蒲圻冀以抗拒援軍不能下攻等語參將彭三元身經百戰屢立奇功候選同知直隸州李杏春學問深醇節概凜然並千總彭獻傑等均以力竭捐軀深堪憫惜可否飭部給予優卹羅澤南一軍由江西入境所向克捷因岳州賊挫崇陽賊多分而爲三遂致中挫移師合剿繼復大勝該道員以新失二將稟請交部嚴議之處伏候 聖裁 臣軍先於二十二日在蒲圻挫失刻已整理與羅澤南會攻蒲圻卽以水陸並進直搗金口上諭內閣此次奮勇殺賊力竭陣亡之參將彭三元著追贈副將銜照副將例從優議卹候選同知直隸州知州李杏春著追贈知府銜照知府例從優議卹千總彭獻傑著照都司例從優議卹藍翎把總胡元則把總李光熾蕭馥山劉碧山均著照千總例從優議卹並准附入湖南地方塔齊布專祠羅澤南帶兵由江西入

楚境連復兩城此次以少擊多雖致中挫仍復大勝所有自請嚴議之處著加恩寬免○諭軍機大臣等覽本日該署撫奏羅澤南一軍接仗情形將士兵勇均能奮不顧身以少擊眾惟彭三元李杏春俱衝鋒殞命殊爲可惜雖二十六日羊樓洞之捷尙能轉敗爲勝士氣不衰究竟傷損精銳皆因兵單所致胡林翼所統各軍旣已力加整頓卽著與羅澤南會合直抵蒲圻石達開韋俊均係著名悍賊見旣麇聚咸甯卽應合力進攻能將該逆殲戮則咸蒲一帶賊匪自必瓦解羅澤南之軍本紮崇陽羊樓兩處今旣併歸羊樓則崇通後路有何接應此時賊勢甚熾攻剿機宜固不在專守城池而此軍一移誠恐得而復失不特前功可惜抑且後顧堪虞應調何處兵勇以爲後路接應該署撫卽與官文商酌如荊州新到川兵及德安得勝兵丁皆可分撥著該署撫飛咨官文迅速

調度羅澤南一軍於勦賊極有關繫而崇通咸蒲又爲江西湖南四達之衝該逆旣以全力來抗我軍亦必併力會攻始能得手此處關鍵一得卽可乘勝長驅由金口直趨武漢切勿稍存大意致誤事機該署撫摺內有岳州兵挫之語是否係湖南防兵逆賊是否不至上竄未見駱秉章奏報並著該署撫將詳細情形附報具奏以慰廬念將此由六百里諭知胡林翼並傳諭羅澤南知之○河南巡撫英桂奏據署固始縣知縣陳贊稟安徽擒首宋之貴在霍邱唐家灣嘯聚卽帶勇往捕會同該處練長周彬士等開放槍礮殲匪二十餘人生擒擒匪王德位等四名並將宋之貴擒獲正法梟示並准王庭蘭函稱李兆受竄踞麻埠當飭兵勇分兩路進發將賊卡攻開直抵麻埠王庭蘭親督後隊進攻九月十九日前隊追至流波壩斬獲首從逆匪百數十名轟斃不計其數立將

流波碰寨基山賊巢焚燬匪眾四散逃竄兵勇裹糧窮追又格殺數十名李兆受帶同薛小等由雁子河九保往英山一路而逸查李兆受竄入英山若專恃豫軍跟追恐此拏彼竄難期就獲必須皖省合力兜剿庶足除巨害而靖邊隅福濟見飭已革道員何桂珍督率英羅等處團練協力殲擒臣亦知照王庭蘭並檄飭商城固始等縣地方官激勵兵團務擒渠惡以絕根株又據余炳燾等稟張落刑等自亳州解圍後退踞雉河集一帶築造土城爲負隅計見會同參將成齡督帶兵勇三千餘名分起赴永城一帶紮營商同江皖官軍訂期進攻惟亳州官兵兩次失利須製備器械軍火方可會剿等情臣當飭令余炳燾等整飭兵勇悉聽武隆額調度務當上緊攻剿毋得遷延貽誤並飭祝壇實力整頓鄉團一面妥議章程會同潁州府知府陸希湜每月定期會查以爲久安之

計報聞○己酉命恭親王奕訢恭捧 孝靜康慈皇后神牌升祔
奉先殿○庚戌以恭上 孝靜康慈皇后尊諡並升祔 奉先

殿禮成頒詔天下○諭軍機大臣等扎拉芬泰等奏查明塔爾巴
哈台民回燒搶情形設法辦理一摺該回民徐天堯等挾俄羅斯
人阻止挖金之嫌屢圖滋鬧至七月十四日夜間遂聚眾燒搶房
屋貨物迨該將軍等派令協領阿克達春前往查辦徐天堯等輒
敢投遞連名呈稟控告章京薩碧屯等有通夷害人情事若非該
將軍等平日約束不嚴臨時復辦理不善何至該回民等肆無忌
憚至此且事經兩月之久案犯未獲尤屬不成事體扎拉芬泰等
奏稱就其遞呈之由將該回民等傳至伊犁研審並先將該章京
等參處然後將究賊追贓等事次第籌辦所見均是著照所請塔
爾巴哈台前署糧員卽補防禦薩碧屯管理夷商圈子筆帖式阿

彌善均著革職委營長禧祿佐領薩炳阿筆帖式和綢額均著解任交扎拉芬泰等歸案審訊務將該回民等燒搶實情嚴究懲辦薩碧屯等如何辦理乖謬之處並著嚴行審究毋稍寬縱其揀派協領哈布齊賢等前往該處驗屍緝犯查搜夷貨及行文西畢爾衙門並屬匡蘇勒官從中解釋令逃去之夷官吏商仍來塔城會同委員清查貨物各事宜均著照所擬辦理扎拉芬泰等督率委員分投查辦務應從公斷擬事事持平勿因細故致啟釁端將此諭令知之○以恭題 孝靜康慈皇后神主賞大學士賈禎 御用袍協辦大學士文慶太子太保○辛亥諭內閣 孝靜康慈皇后丹闡著擡入正黃旗滿洲○諭軍機大臣等前因皖省軍需孔亟諭令怡良等於此數月內每月籌銀二三萬兩解赴廬州嗣據怡良覆奏已於江海關代徵絲稅等項下籌得銀二萬兩先行解

赴廬營此後能否按月撥解尙難豫定本日復據和春福濟奏稱見已克復廬城亟圖進剿勢難停兵待餉而本省旣羅掘一空外省亦屢催罔應惟向榮曾以抽釐餘銀分撥五萬兩解往該省因擬請將浙江月撥金陵之款移解皖營其怡良應撥皖餉卽令就近解赴金陵等語浙江按月接濟金陵軍餉已有定章若頓事更張改令移解皖省必致轉多周折況金陵軍餉亦有欠至三五月者除浙餉外別無指款本日業將不能分撥此款情形諭知和春福濟矣惟是皖省餉需支絀亦係實情怡良統轄該省責無旁貸著仍遵前旨詳悉籌商移緩就急務須源源接濟按月籌撥銀數萬兩解赴皖省以定軍心而資攻剿將此由六百里加緊諭令知之○和春福濟奏張落刑等同竄亳州節經朱連泰等晝夜嚴防該匪復由上游繞出城南約有二三千人向城轟擊我軍開礮抵

禦該匪不得近城適附近團練來城接應遂令兵勇出城合力夾攻在馬廠接仗殲匪百餘該匪渡河大股往東北竄逸由雉河關入蒙城非趕緊圍攻實有蔓延之慮臣等疊派臨淮勇六百餘名並飭都司戴世熙等帶兵勇二千餘名先後赴援統歸朱連泰調遣計已全數抵亳會同陸希湜所部竭力籌剿而張維翰等所帶兵勇總未出境興慶容照亦未知曾否到亳專恃皖省兵勇恐匪類眾多此圍彼竄且此時亳州無匪大股皆至蒙城臣等飛飭武隆額兼程前進徑赴蒙城統兵進剿一面檄飭鳳臺懷遠宿州各地方官弁竭力嚴防上諭見在捻匪由亳州擾及蒙城勢殊猖獗若非趕緊圍攻實有蔓延之慮武隆額接奉前旨當已帶兵啟程仍著崇恩催該提督星夜前進徑赴蒙城會合各該省兵勇實力圍攻毋令再肆竄擾武隆額一面前赴蒙城一面即可催令各

該省官兵同時並進並著英桂飭令余炳燾張維翰等星速赴蒙
上緊攻擊福濟等總當急圖進剿迅奏膚功勿再遲延將此由六
百里各諭令知之○以恭請 神牌黃輿賞鑾儀衛校尉銀○安
徽巡撫福濟奏李兆受前在豫境聚眾戕官罪大惡極上年經已
革道員何桂珍在霍山堵剿大受懲創遂向該革員投誠本年由
英山敗回復在六霍一帶糾眾慘殺焚擄當令四品卿銜王庭蘭
會同地方官實力進剿該匪被圍窮蹙又乘閒竄回英山仍求效
力查該匪急則乞降乃其慣技若仍以招撫了事必至貽害閭閻
已嚴飭將士設法擒獲以靖地方報聞○王子以 孝靜康慈皇
后梓宮由綺春園奉移賞添設值班兵丁一月錢糧墊道步甲等
半月錢糧○癸丑諭內閣朕惟愛民實政薄斂爲先近年以來軍
務河工民生重困朕不惜蠲租發帑加惠黎元猶恐苛累之條蠲

除未盡因念河南省有河工一款每年應徵銀四十餘萬兩係從前馬營儀封漳沁等工用過土方各項加價在於地糧內按限攤徵之款與錢漕正項本屬不同三十餘年積欠纍纍該省賦額甲於天下連年兵燹水災差役繁重而正供之外復有此項攤徵朕軫念閭閻豈忍令其久爲民累所有此項河南省每年應徵河工加價等銀著自本年爲始加恩豁免永不攤徵俾小民得以專完正課如有本年已徵在官者著該撫查明抵作今年正賦至歷年積欠攤徵銀兩昨諭戶部查明除道光二十年已前業經豁免外其自道光二十一年起至道光二十九年共未完銀二百四十七萬六千二百九十六兩零本係查辦豁免之項尙未據該撫奏到自道光三十年起至咸豐四年共未完銀一百七十五萬六千四百二十八兩零係應行催追之款著一併加恩豁免此係朕博訪

周諮久欲加恩該省者特以莠民恃眾抗違不知自愛未便遽頒
曠典轉起刁風今河北頑梗之徒均已伏法其良民被累者亦皆
耕鑿相安輸將日形踴躍正宜恩膏特沛咸與維新該省士民經
此次加恩之後錢漕地丁止輸維正之供民力既紓國課不難早
納如有不肖官吏仍敢浮收勒派影射冒徵或桀驁匪徒把持煽
惑者朕惟執法嚴懲決不姑息該撫卽刊刻謄黃徧行曉諭務使
鄉城村堡一律周知用副朕念切民依施恩格外至意該部卽遵
諭行○追予河南殉難知縣潘樹霖建立專祠○甲寅 上詣迎
暉殿 孝靜康慈皇后几筵前行祖奠禮申刻行辭奠禮○賞守
護 慕東陵官兵等飯食銀兩○諭軍機大臣等御史陳慶松奏
請飭滇省大吏撫輯民回不宜過分畛域一摺據稱近來雲南省
永昌腴田盡歸民人將回子驅逐徼外失其故業往往勾結夷人

沿途滋擾自曲靖至永昌上下二千餘里民回雜處回子每思報復等語國家一視同仁民回皆係赤子地方官彈壓撫綏本不應過分畛域況見在黔苗不靖雲南蒙化景東二廳均有刁民鬧糧土匪劫村之事若不安爲安輯恐致重煩兵力殊非綏遠之道前恆春奏曲靖府屬之尋甸州東川府屬之巧家廳漢回互鬪匪首要犯尙未拏獲務當督飭文武隨剿隨撫趕緊肅清毋令蔓延並飭地方官吏遇有民回鬪案必當秉公審辦固不可寬縱養奸亦不可偏私激變總期戢暴安良弭患未萌方爲妥善原摺著鈔給閱看將此由六百里諭令知之○兵部左侍郎常志卒賞銀五百兩治喪○以載堪爲兵部左侍郎

由內閣學士遷

○乙卯

孝靜康慈皇

后梓宮發引 上步行至紅橋跪送號慟不已命恭親王奕訢恭奉梓宮奉安 慕東陵 隆恩殿○諭內閣官文奏遵查已革

提督請免治罪等語已革提督孔廣順前因在德安營出隊時並不親自統帶以致兵勇潰散當經降旨拏問交官文嚴訊確實具奏茲據奏稱該革員向來帶兵尙屬得力此次實因傷疾舉發以致兵勇潰散尙非藉病推諉孔廣順著免其治罪仍畱湖北軍營交官文差遣以觀後效○諭軍機大臣等前因德安克復逆賊由孝感逃回武漢諭令官文迅從漢川一路進剿並恐羅澤南兵力單弱令發精兵接應昨據載增等奏魁玉等攻克仙桃鎮鄢家灣等處中路漸就疏通該大臣正可督師南下乃覽本日官文奏報收復漢川縣城仍暫駐德安部署一摺實堪詫異官文馳抵德安已在收復郡城之後計今又逾半月不卽乘此聲威趨程進發遠駐無賊之地似此有意遷延避難就易何以激勵軍心羅澤南以五千餘勇敵賊數萬因彭三元等勦辦失利扼駐羊樓事機喫緊

急盼北路援兵會剿何以此次未聞籌及見在中北兩路均已得手卽當統率官兵由北而南與襄河兵勇乘勢下壓約會胡林翼等爲三面兜剿之計其西凌阿所帶馬隊酌量畱駐德安以固北路不得藉布置善後爲詞致失機宜自干罪戾將此由六百里加緊諭令知之○官文奏報追退襄河賊匪收復漢川並暫駐德安情形得旨汝又遠駐德安豈置竄逆於不顧耶前屢次諭令不可擇駐無賊之地若如是行止避難就易徒知收巴成之功將何顏以對眾將士復何顏遽言入奏耶○向榮吉爾杭阿奏鎮江逆匪被我軍犁毀金雞嶺賊壘後卽負固不出九月十三日探有竄往瓜州之信臣等恐其聲東擊西當飭東南兩路各嚴警備仍於十四日五更派令副將慶文等統領大隊自西路分道截剿該逆甫經出城見官兵勢大仍復竄回我兵直抵寶蓋山下及西門外一

帶地方連環轟擊傷斃極多臣等竊思該逆雖未突圍北渡而金山兀峙中流爲其所踞南北之往來總難斷絕隨即密派千總李玉林等豫備火船帶領水勇從上游高資港放船出口潛襲金山適遇賊匪哨船我船開槍擊沈數隻餘皆逃回金山遊擊陳世章駛赴下游擊沈賊船數隻其餘賊船立即星散臣吉爾杭阿親督各路兵勇至煙墩山一帶接應余萬清派出隊伍在摩旗山一帶爲後路聲援迨聞江中槍礮聲起慶文等分路由金雞嶺煙墩山進攻寶蓋山該逆憑高施放槍礮拒敵我兵奮勇轟擊望見賊壘中旗幟倒亂乘勢上衝臣吉爾杭阿復會同虎嵩林督飭慶文等各帶小隊前赴南門外虎頭山查看地勢瞭望城中情形以誘之該逆鼠伏不出旋見我人數不多卽有數百人前來衝犯當經在煙墩山南紮營之周兆熊等前來接應與慶文等夾擊將此股逆

匪殲盡旋接探報金陵逆匪挑備馬步數千分三路由陸來鎮救

援臣向榮卽抽撥兵丁移紮附近龍潭之東陽鎮地方臣吉爾杭

阿派隊在高資鎮紮營五座以扼其衝報聞○以錢忻和爲江蘇

按察使

由直隸天津道遷

○丙辰向榮奏十月初一日黎明該逆從朝陽

門龍脖子各出賊匪數千分撲川東湖南營盤經副將西林等迎
剿斃賊二三十名該逆撲近明陵左側適張騰蛟伏兵齊起擊斃
甚多賊勢稍卻遙見後有騎馬賊千餘已由太平門接應又有大
股分作兩翼由鍾山腳下馳突鈔來副都統德崇額督領吉林黑
龍江馬隊同副將王俊自靈谷寺山前分隊迎敵其時署江甯將
軍福興已鈔至湖南營前督戰卽令迎擊李定太率同親軍從旁
要擊並令川東貴州官兵與兩廣各勇夾擊該逆反奔自相踐踏
均向龍脖子逃去蕪湖各壘餘賊自鄧紹良火攻後乘勝晝夜攻

勦未能得手惟節次截勦旗羅山一帶援賊屢有斬擒止因圍勦兼籌兵力不敷分布見於蕪湖西南二街口趕築礮臺三座移營屯扼並將二三千斤大礮運往縣擊該處緊對寶塔根之前兼可旁擊大石壘及小河南之賊我兵將該逆浮橋擊斷賊壘兩面不通可期漸次掃蕩吳全美泊堵上游探有安慶賊眾分水陸來援蕪湖經紅單船赴泥汊河迎勦燭沈賊船十餘隻餘逆向上游遠逃復經吳全美節次扼勦斃賊甚多臣檄令吳全美分扼礮等處並撥李德麟拖罾船歸併調遣兼顧南北兩岸報聞○截留山東新漕二十一萬石並上年勸捐兵糈穀八萬八千餘石省城防堵買收穀麥豆四萬七千餘石及各州縣應交津貼運費備賑被水災民○丁巳諭內閣道光三十年正月十四日 皇考宣宗成皇帝升遐朕與顧命大臣敬啓密緘欽奉 硃諭皇六子奕訢封

爲親王欽此朕祇遵 遺命於十七日降旨封奕訢爲恭親王並
於恭撰 慕陵碑文內敬謹敘述惟是中外臣民但知奕訢之封
親王係朕卽位後之推恩未知係 皇考遺命不足以傳信後世
著將此旨宣付史館於 實錄 本紀內將 皇考硃諭封奕訢
爲親王纂入道光三十年正月十四日 遺命各條之次以昭信
史○諭國家設兵衛民非平日勤加訓練不足以資捍禦京旗各
營尤以練習技藝爲本務自宜亟加整頓以嚴武備所有健銳火
器圓明園八旗各營以及前鋒護軍八旗漢軍等營應行操練兵
丁著各該管王大臣認真訓練務使技藝精熟毋得有名無實並
著閱兵大臣親往覈實校閱分別勸懲其如何定期簡閱之處卽
著閱兵大臣妥議章程具奏○己未諭軍機大臣等恆春奏黔省
勦辦苗匪請速撥軍餉鮑源深奏苗患緊迫請於鄰省撥兵籌餉

並丹江失守援兵坐視各摺片前因蔣爵遠奏餉需匱乏已疊次諭令葉名琛柏貴恆祺黃宗漢文俊將應解黔餉迅速籌撥該督撫等自當遵旨陸續解黔藉資支放矣黔省苗寨眾多良莠不齊此次紛紛滋事除各寨爲首頑苗必應嚴加懲治其餘脅從苗人若能震懾兵威咸知畏罪自應設法解散妥爲撫綏若紛紛徵調撥兵多則籌餉益難恐辦理愈形竭蹶所有四川官兵除派蔣玉龍酌調帶兵赴黔外其餘無須調撥仍著恆春蔣爵遠斟酌見在情形如上游漸就肅清即可飭令孝順等移兵下游會同承齡等實力攻剿並設法解散以期迅速蕺事藉省兵力至丹江廳被匪竄擾及王定臣等兵勇阻隔情形雖經蔣爵遠奏稱該員等委因兵力不敷並非畏葸不進惟丹江失守尙未具奏仍著查明帶兵赴援之署都司王定臣卸署甘泉縣知縣黃鳳把總黎朝勸縣丞

陶文暈等如有坐視不救等情據實參奏俾行閒員弁悉知儆惕
不至貽誤事機將此由六百里各諭令知之○諭官文奏馳赴中
路督攻漢陽一摺據奏由蔡店進攻漢陽之兵共一千九百餘名
由楊店進攻漢口之兵共二千九百餘名由侏儒山進攻漢陽之
南勇共三千餘名加以顏朝斌所帶川兵二千五百名數已逾萬
果能分投並進併力會攻原不難力克漢陽聯絡南岸但閱該大
臣所奏有催齊後隊卽日由德安啟程之語似全隊進兵尙需時
日軍務貴速豈可空言布置遲遲不發著嚴督派出諸將剋日前
進齊抵漢陽漢口不准稍有遲滯該大臣前奉此旨進攻德安在
京山安陸一帶屢次耽延此次馳抵中路若徒恃派出兵勇而該
大臣又沿途逗畱深恐兵心懈怠無以鼓銳氣而奏膚功著卽親
統官軍趨程前進與各路兵勇同抵該郡以期迅速攻克夔巫防

兵已諭黃宗漢飛催前進但恐緩不濟急該大臣惟當迅克漢陽則大江南岸聲勢自通若北岸徒事遷延而以道路寫遠之兵指爲接應南勇之用儻羅澤南一軍稍有挫失該大臣不能藉口諉過也其侯鳳岐所帶官兵仍著該大臣嚴催速進毋許遲延將此由六百里加緊諭令知之○諭前因湖北荊州喫緊諭令黃宗漢將前駐夔巫兵二千名令德恩帶往荊州至潛沔一帶會勦此項官兵是否啟程尚未據該督具奏茲據官文奏稱川兵尙在待餉請飭迅速前進等語著黃宗漢卽將兵餉撥給飭令該署總兵督帶飛速前進以資接應至黔省兵單餉絀情形喫緊見在都江廳城尙被苗匪竄踞著該督卽飭前調赴黔之參將蔣玉龍酌帶勁兵前進毋任逗畱並將前諭該督之籌解貴州餉銀十五萬兩迅速籌撥解赴該省俾資接濟毋誤急需將此由六百里加緊諭令

知之○是月蠲緩山東臨清等五十五州縣德州等五衛及永阜等場被水災區新舊額賦展緩兩淮丁溪等十四場被水竈地新舊額賦有差